



14 Maiu 2021

## Mensajen husi Embaixadór Austrália ba Timor-Leste, **Peter Roberts**



Benvindu ba ami, Embaixada  
Austrália nia buletín ba datoluk iha  
tinan ida ne'e.

Infelizmente kazu COVID-19 sei  
nafatin aumenta ba bebeik ho lais iha  
Timor-Leste laran tomak. Desde ami  
nia buletín ikus liu semana rua ba  
kotuk, rezista ona maisumenus kazu  
rihun-ida-atus-lima (1,500), barak liu  
duke un-tersu ba totál número kazu  
ne'ebé rejistradu iha Timor-Leste  
desde pandemia ne'e hahú.

Austrália kontinua hodi apoia  
Timor-Leste – tantu ba esforsu  
rekuperasaun ba inundasaun no mós  
ba resposta ba COVID-19. Tempu  
hirak ne'e sai nu'udar tempu ne'ebé  
difísil maibé ita hamutuk bele atinje  
nafatin buat barak ho di'ak.



### Iha semana rua ne'e nia laran, Austrália halo ona:

01

Entrega lote dahuluk vasina AstraZeneca ne'ebé prodúz iha Austrália ho totál 20,000 ba Timor-Leste, nune'e tulun hodi hala'o kampaña vasinasau nacionál ba faze daruak nian. Sei iha tan distribuisaun haruka tuir mai, aliña ho Austrália nia kumprimisu hodi asegura vasina ne'ebé seguru no efetivu ba populausaun porsentu 80 ne'ebé mak la kobre husi COVAX.

02

Fornese ona Ekipamentu Protesaun Pesoál ho material médiku nian inklui instrumentu halo teste ba COVID-19 ho kuantidade boot hodi tulun Ministériu Saúde, SAMES no Laboratóriu Saúde Nasionál hodi responde ba COVID-19.

03

Kontinua ona fornese akonsellamentu husi especialista téknika ba esforsu responde saúde públiku no tratamentu moras grave nian ba COVID-19 no ba inundasaun liuhosi Ekipa Asisténsia Médiku Australianu (sigla Inglés: AUSMAT).

04

Mantein fó apoia ba maluk sira ne'ebé mak hela iha Sentru Evakuasaun depoizde inundasaun. ONG sira ne'ebé inklui ba Austrália nia Parseria Umanitária hala'o serbisu ona ho Protesaun Sívil no Ministériu Solidaridade Sosiál no Inkluzau hodi asegura hatan ba nesesidade esensiál inklui hahán, segurasa no médiku. Alende ne'e, ami mós fornese ahi-oan uza painel solar, tenda no material hadi'ak uma nian ba família hirak ne'ebé mak afetadu tanba inundasaun.



Ha'u orgullu tebes simu ha'u nia vasina AstraZeneca doze dahuluk nian iha lansamentu vasina ne'ebé Ministériu Sáude halo iha semana ida ne'e. Aleinde ne'e, Embaixada nia kampanha voluntaria hodi membru ekipa sira simu ona vasinasaun mak la'o ho popular tebes, membru ekipa embaixada hakarak atu proteje sira nia aan, proteje sira nia maluk no komunidade.

Atu nafatin atualiza ho informasaun tuir mai, tuir ami nia pájina Facebook 'Australia in Timor-Leste'. Ita bele hetan ami nia buletín nia edisaun antigu sira iha ami nia sítiu internet.



05

Serbisu ona ho Bee Timor-Leste hodi asegura katak bee moos disponivel bainhira no iha ne'ebé mak maluk sira presiza. Desde inundasaun, bee hamutuk litru millaun 7 resin mak transporta ona ba sentru evakuasaun no komunidade sira nia tanke, ida ne'e tulun tebes redúz ba moras ne'ebé mak mosu tanba bee-foer ba komunidade sira ne'ebé mak afetadu.

06

Mantein partisipasaun ativu iha nível síniор hodi asegura ami nia parseria ne'e responsivu no aliña tuir nesesidade. Primeiru Ministru na'in rua Scott Morrison no Taur Matan Ruak hala'o diskusaun ida ne'ebé mahon tebes liuhosi telemovel iha semana kotuk. Iha Canberra, Australia nia Ministeriu Negosius Estrangerus mós hala'o komunikasaun regular ho Timor-Leste nia Embaixadora, Inês Almeida.



Krédito fotografia: Paizinho Tilman / Gabinete Primeiro Ministro

07

Fornese apoia finanseiru ba konstrusaun postu fronteira foun haat hodi tulun PNTL sira nune'e prevene movimentu ema no sasán illegal no haforsa kontrollu ba fronteira. Polisia Federal Austrália (sigla Inglés: AFP), liuhosi Programa Dezenvolvimentu Polisia Timor-Leste (sigla Inglés: TLPDP), mós hahú ona konstrusaun postu dalimak iha Illa Ataúro hodi apoia polisia marítima sira.

08

Apoia ona F-FDTL nia enjiñeiru sira hodi hadi'ak facilidade izolamentu ba COVID-19 ida iha Baucau liuhosi Programa Kooperasaun Defeza (sigla Inglés: DCP). Austrália nia programa Parseria ba Dezenvolvimentu Umanu (sigla Inglés: PHD) tulun ona liuhosi sosa toba-fatin 60, kulsauñ no hena. Xefe F-FDTL, Tenente Jenerál Lere Anan Timur no Austrália nia Komandante Primeiru Divizaun Majór Jenerál Jake Ellwood hala'o diskusaun ba ita nia kooperasaun defeza ne'ebé mak forte liuhosi telemovel iha semana kotuk.